

四庫全書

史部

欽定四庫全書

史部

欽定盛京通志卷一百二十七

侍郎<sub>臣</sub>劉躍雲覆勘

總校官編修<sub>臣</sub>朱 鈐

欽定四庫全書

欽定盛京通志卷一百二十七

國朝藝文十三

記十



欽定四庫全書

欽定盛京通志卷一百二十七

國朝藝文十三

記

勅建護國寺塔記

崇德庚辰

剛林

夫幽谷無私有至斯響洪鐘虛受無叩不鳴而况  
於法身圓對規矩冥立一音稱物宮商潛運故如  
來利見迦維託生王室憑五行之軌拯溺游川開

八正之門大庇交喪法力維持乎八極慈威鎮攝  
乎羣魔大智靜涵靈源普挹

聖主道濟蒼生化隆無外念茲功德允合瞻依

特敕工部遴委喇嘛錫伯札綽爾吉弼勒圖朗蘊相為度

鳩工

盛京四面各建莊嚴寶寺每寺中大佛一尊左右佛  
二尊菩薩八尊天王四位浮屠一座東為慧燈朗  
照名曰永光寺南為普安衆庶名曰廣慈寺西為

虔祝

聖壽名曰延壽寺北為流通正法名曰法輪寺各立穹碑  
永垂來禩銘曰

皇圖肇啓寶域宏開仰茲佛日躋於春臺雨暘時叙國  
無祲災三途靡忒五福斯來

銀岡書院記康熙乙卯

郝浴

鐵嶺古銀州也浴甲午九月謫奉天戊戌五月下  
嶺卜築於南門之右方十許畝中為書屋三間前

有圃種蔬後有園種花左壁吾臥室也右壁一帶  
皆吾友連屋而居也屋中造甃床一丈風月之夕  
吾友畢來登牀趺坐床下鑽火烹茶漉酒縱談名  
理至夜分不散架挿天下古今圖書恣吾友展玩  
有化人來則焚香晤對參驗竺乘屋後一岡隱然  
龍卧所謂銀岡者也雨後登之見郭外羣山紫翠  
交寫其北山綿亘西繞而東山迤邐南屬簇擁萬  
狀中控一背是為鐵嶺然總維於一線之銀岡殆



物之鼻祖者乎吾岡下所種桃李皆數度開花而成實矣所舉二三子亦哀然冠而似丈夫矣吾歸之歲歲德在邗西牕北有杏一株發花數十倍如蠟撚白梅香色雙絕而花枝婉轉皆回頭西視是皆不足記獨念吾霜天雪夜一燈炳照大靜之餘徹四壁於環海晤羣聖於斯須截然有覺心目為豁於戲非吾銀岡吾安得有此一日也非吾

至尊又安得有此銀岡之一日也泣撫銀岡留為書院有

踵至吾岡而默識浴一日之旨者浴即近待於數  
十年遠待於千百世心皎然如一日也

封長白山記康熙丁巳

方象瑛

康熙十有六年四月望日

上以長白山發祥要地

特命內大臣覺羅武穆訥一等待衛兼親隨侍衛費雅什

一等待衛塞護禮等於大暑前馳驛往五月四日

啓行十四日至

盛京二十三日 至烏拉宣

諭鎮守將軍等 召村莊獵戶 皆無知長白者 都統尼雅罕  
族祖岱穆布魯世 採獵以老退閒 自言祖居額赫  
額音聞其父嘗云 獵鹿長白山 負以歸 四日可抵  
家 以此度之 長白與額音 距當不遠 因問額音 路  
幾何 獵戶噶拉達 額赫等曰 陸行十日 水路乘小  
舟二十日 乃命獵人喀喇前導 各持三月糧 又慮  
食盡馬乏 不能歸也 期將軍巴海 載米一舟 候於

額音於是鳴拉達額赫等由舟覺羅武穆訥率薩  
布素由陸六月三日啓行經溫德亨河防虎山庫  
勒訥林奇爾薩河溫都河布爾堪河納丹佛勒地  
方輝發江發河穆敦林巴克坦河納爾琿河敦敦  
山扎倫果河凡數十處抵額音而鳴拉達額赫等  
亦至蓋自江逆溯由呼努湖河至佛多和河復順  
流來會纜七日耳十一日發額音一望林莽迷不  
得路薩布素率旂甲二百人伐木開道十二日悉

衆行是日薩布素遣顧愷等先後馳報前進約百  
數十里登一山升樹而望遙見遠峯白光片片殆  
長白山也因留噶拉達額赫等督米珠蚌十四日  
與薩布素等會密樹茂林揣摩開路十六日黎明  
聞鶴鳴六七聲雲霧迷漫不復見山乃從鶴鳴處  
覓徑得鹿蹊循之以進則山麓矣始至一處樹木  
環密中頗坦而圓有草無木前臨水林盡處有白  
桦木宛如栽植香木叢生黃花爛漫隨移駐林中

然雲霧漫漫無所見也衆惶惑前誦

綸音禮甫畢雲披霧捲歷歷可觀莫不歡呼稱異遂攀躋  
而上有勝地平敞如臺遙望山形長澗近視頗圓  
所見白光皆冰雪也山高約百里五峯環繞憑水  
而立頂有池約三四十里無草木碧水澄清波紋  
蕩漾繞池諸峯望之搖搖若墜觀者駭焉南有峯  
稍低宛然如門池水不流山間則處處有水左流  
為松阿哩烏拉河右流為大小額音河瞻眺之頃

峯頂遊鹿一羣皆駭逸惟七鹿忽墜落衆喜曰神  
賜也蓋登山適七人時正乏食拜而受之回首望  
山倏復雲霧遂於十八日南回至前登山高望處  
一氣杳冥并不見有山光矣二十一日至二額音  
河合流處二十五日至阿魯河則額音東流合處  
也二十九日由阿魯庫河歷色克騰圖畢赫噶爾  
罕噶達琿薩滿薩克錫法克錫松阿哩多觀大江  
險絕處凡九七月二日次烏拉十二日抵寧古塔

遍聞會寧諸府八月二十一日還京具疏

聞

上以發祥之地奇蹟甚多山靈宜加封號下內閣禮部議  
封為長白山之神歲時享祀如五嶽焉夫封山之  
典肇始唐虞然報祀嶽瀆非有關於鍾祥之自也  
志稱長白山橫亘千里高二百里巔有潭周八十  
里南注為鴨綠北流為混同

國家龍興所自然至今無知其處者



睿慮周詳穆然念

祖宗所由興專官訪求備歷險異卒光大典以答

神庥其享天心而致靈貺宜哉謹撫原跡綴葺為記用

志千萬世無疆之盛云

奉天府文廟志

康熙己未

梁拱辰

嘗讀班史有曰文德者帝皇之利器武功其輔也  
余則以為武功者帝皇之利器所以開治者也文  
德所以保治者也武功之所定者遠文德之所化

者深漢唐以來莫不皆然我

太祖高皇帝之起於東陸也始以武功定全遼於學校未

遑也

太宗文皇帝修建廟學而文教聿興

世祖章皇帝平定方夏首崇文治改衛為

盛京設立師儒以訓子弟

今皇帝即位多士克生先後繼美文明之化日隆而文廟

漸起前後京兆以請時兵餉方殷增華有待猶眷

眷不忘特

諭守臣設法修建至康熙十八年秋拱辰再奉

命尹茲土乃奉行前

旨率二府二州七縣之官儒紳士捐俸出財修治之於是  
聖殿櫺星門暨四周垣牆皆鼎新焉師儒得以瞻仰人  
士得以矜式豈非武功定而文德興乎然予觀詩人  
所言景員之祥發於殷土生民之慶本於姜嫄則  
本朝之肇基必有出於武功之先者也今也武功已

定文教復興人才於是輩出治化於是休隆矣然  
予願司教者之求其實也夫詩書禮樂非徒以飭  
容觀琴瑟笙簧非徒以美聲律要以調習其性情  
消釋其鄙戾使之居家處鄉則有孝恭禮遜之行  
服官蒞政則有公忠廉仁之節斯學校為育才之  
區人士有治平之任不然雖實枚其磨礮闕洫其  
宮宇亦何益乎若溺於文辭習於佻達此又人才  
風俗所由收壞者不可不豫為防也

遊遼陽千山記康熙壬戌

張玉書

康熙二十一年歲在壬戌海寓削平慶典具舉春

三月

車駕至

滅京告成功於

列祖

三陵畢謁

巡蒞邊塞

特敕扈

蹕部院諸臣留都祇候臣玉書叨與侍從自

興京奉

命返轡時日休暇將徧歷州邑諏訪舊聞會積雨中阻不  
獲遠涉遼陽城南五十里為千頂山迤邐盤互夙  
擅竒勝望後十日持襍被杖策以行比過遼城獲  
覩

太祖高皇帝駐師築壘據河克敵之遺蹟又延問故老得

年八十以上者二人指述舊事尤詳越宿冒雨入  
山既至風日開霽恣覽縱陟往返凡八日山多奇  
峰巒坳稠疊不可指屈故名千頂僧寺最著者五  
曰祖越龍泉中會大安香巖志無紀載或曰唐貞  
觀中征高麗曾駐軍於此語多附會據元皇慶中  
直學士陳景元撰僧雪庵塔記言僧自鑿巫閭駐  
馬大安後移居鴨綠江復還香巖具有異蹟今香  
巖寺西有雪菴塔而諸山所傳名勝亦往往以雪

庵著則五寺舊址雖不可考而其創建在元以前  
興起在皇慶以後亦可信矣夫遼陽為

國家肇基重地

陵宮相望百有餘里此山螭蜒瑰異媿之往代當在東都  
瀍澗西京灞杜之間而關塞遼遠輪蹄罕及致使  
靈峯鷲嶺鬱而不彰臣玉書來觀欣嘆希覩隨跡  
所至用志梗概山不勝紀仍以五寺繫焉循遼城  
而南里許山色凝碧籬落類江左至八里村有梨



數百株雨後吹白如雪踰石門度七嶺東南行湯  
泉泉近濁可滌不可飲也入山經邢崖徑路逼仄  
萬峯回互鳥鳴樹底雜卉蒨翳梨最盛彌漫溪谷  
七八里不絕過南塔有官亭遺址勝國時將吏宴  
游休暇之地又數武至祖越寺寺環山而構面俯  
背倚左右拱揖高輒數百仞巒岩洞石各各肖形  
有神人仙佛蓮月盃鉢螺髻獅象之屬惜無高人  
勝流持擇評品雖稱名近鄙仍而不變也由寺東

緣磴而上脫帽杖藜盤薄沙礫數百步得巨石石  
形如丸圍徑以丈許兀踞峯頂凌虛聳特不敵不  
仄石上為松坡為石佛崖為羅漢洞洞對峙曰振  
衣岡磨崖大書蒼潤可愛名氏已蕪蝕畧見彷彿  
而已又里許歷危磴數百級至巔鑿壁為斗室顏  
曰無梁昔有老僧精梵律者常棲宿其地他僧處  
之或觸鬼物或虎嘯於側中夜惴慄輒携軍持而  
下僧浩然云自祖越折而西可五百步兩崖夾峙

劃然如門既入泉流深激冷冷如操石琴溯流而  
上一徑盤紆古木間植遶龍泉寺聞竹鼓聲遙與  
泉聲應而輞轡鳥語雜沓其中泉出寺後彌勒峯  
峯左有石洞方幅數尺珠光噴湧穿澗而溢寺僧  
截木承之剜腹類竹引入牖下有若懸溜凡祖越  
所見西北諸峯皆在寺東峯勢詭異險幻正側殊  
狀遊者心目駭蕩不諦視不能辨也寺延袤僅數  
畝其築室架壑皆依山偃仰有清越環映之致故

山徑峭窄而取境特奇寺為故相國范文肅公舊  
遊地其子忠貞公所書宇存藏經閣中寺僧寶而  
藏之出以示客結構嚴冷如見其人龍泉距中會  
不十里山徑曠衍林隩暢蔚虎跡交錯竟日無行  
人晨興循龍泉東麓折而南有北鹿十數注坂徐  
下僧曰此鹿就飲溪澗水耳畋獵罕至故與人狎  
時墮虎口至中會寺寺前為水閣方廣半畝夏秋  
之交靈潦演溢九峪之水匯注於下閣因是得名

其盛時水石交映禽鳴魚沫頗極登臨瞻眺之勝  
今閤久廢僅存石址而水勢亦湮塞尋所謂九谷  
水故道無識其源流者可為太息中會在五寺為  
簡寂禪宇剝落無復舊觀僧恥若遼陽人有學行  
築室數楹書史盈案龍泉西南諸山皆倚室東隅  
而松苔峯西峙與粥魚庵故址相望嵐氣環匝視  
靜而聽遠坐移時窅然深也出中會行十里許草  
樹藪密溪流鏘然水穿石中時露時伏是為大安

寺山址又里許徑路盤紆下馬拾級而上行五百  
餘步徑漸平復騎距寺半里許奇峯疊嶂出雲  
表如立如踞如拱如戴孤挺峭厲率去地數千尺  
寺枕山之中前俯後仰萬象盤鬱入寺憩五峯丈  
室閣鈴松韻時發異響坐久之邀兩僧導游人授  
一藤杖循百佛堂過薛菴至瓔珞峯峯突兀無梯  
膝行而上有泉出石旁如盎既下入萬松林逶迤  
里許隱蔽日月野卉數十本色丹而妍錯互於古

松之陰幽麗特甚自此山益竒徑益偏沙磔雜糝  
積葉盈數尺怪石怒攢下視無際心懼然而危乃  
命兩僧前挈後掖策杖其中同行七人穿叢莽排  
株朽纍纍然趾背之相錯也行十餘里至羅漢洞  
洞深五六丈懸崖後阻蘚壁對峙有明嘉靖中華  
學士察題石出洞口折而西遙望石穴如牖為雲  
封洞背雲封過馬蹄嶼當衆山之中南而通明北  
俯中會若襟帶然又百餘步經石門渡嶺天風乍

起山水盡號仰睇仙人臺一峯斗絕空際疑不可  
即循磴道徐上約數十尋至臺址左深潭右絕壁  
環顧諸山盡在肘腋之下臺距趾二丈許上布石  
枰柳柳州記仙奕山庶幾似之而其矗立萬仞之  
巔峻噌竒詭飛鳥垂翼虎豹却顧海內諸山所罕  
覩也此峯居大安中會香巖之間山脉之所蒼萃  
故遊大安者指為盡境折而下則去香巖為近於  
時夕陽在山陰氣慘澹不及還大安遂尋香巖而



西距仙人臺二百步有徑東南行孤峯旁突為觀  
音閣閣久廢而其地特勝衆山環列蒼靄畢會蔚  
然巨觀又東為夾峯元僧雪庵棲息之地峯下為  
洞洞口正黑傾亞不能措手足捫一穴僅容兩膝  
兩石離立橫木其中背石履木下見深壑側身而  
入攀穴而出極山行之險甫出穴復對立一峯架  
木為梁闊僅踰尺引繩乃度夾峯之名以此峯頂  
有巨石有古屋有斷碑峯外道絕仍觸險出洞口

歷鸚鵡石雨花臺循錦繡坡至香巖日已暝矣僧  
言深夜常聞虎嘯繞佛閣數匝而去遂瑾戶就宿  
曉起捫石碑得元直學士陳景元撰雪庵塔記碑  
覆土中百餘年掘土得之苔蘚癢胝雜以塵垢字  
畫漫漶不可辨強起衆僧鉤剔滌除纖翳盡去所  
刊缺者纔七八字文載雪庵始末甚詳字體亦道  
潤諸寺碑版之文此居第一由山後循舊徑度嶺  
又尋別峯東過雙井撫朝陽寺碣折入松林經大

安而返千頂勝概以大安為最而山徑竒特實在  
香巖大安交會之介以道出諸山之背邃奧深隱  
故多見側勢登覽者憚其僻遠往往避險而就夷  
皆未能窮極茲山之勝者也

廣寧縣義學記康熙庚申

項 蕙

蕙以庚申正月莅廣寧再閱月規治東隙地將誅  
茅為舍招邑子弟而延師教之邑之父老似有疑  
而議者蕙悉其狀集諸公廨而問之曰吾儕小人

誠不知治要竊見號神君者雖多殊績大抵不過  
急所當急緩所當緩而已矣我公下車勵精圖治  
以休息民力為心乃開割清俸誅茅為舍以教邑  
子弟是近迂非所望於我公也余曰必何務之為  
急曰教民稼穡力作貿易使勿興訟而耗財余曰  
若輩何知急其所緩正以急其所急也試畧言之  
吏治衰則民風敝而民風之敝不敝於推魯鄙樸  
之氓而敝於聰明才智之士推魯鄙樸者或農或

工或商即上之人不以督迫亦從事焉唯聰明才智者教之農或越其畔教之工或躍其治教之商或折其本彼之聰明才智心有所弗屑也其父兄初或溺而縱之繼雖不欲縱業已成習放蕩不可收拾呼朋引類忘三餐所自來視六博為正業招尤啓釁蕩產傾家其為害一也又煽惑彼推魯鄙樸者為其所為相率而從惡以致夫不之督迫而業農業工業商者竟日加督迫而不農不工不商

矣游惰滿街淫酗成俗究厥病源實為戎首其為  
害二也况又不但不農而為之辭曰地瘠不但不  
工而為之辭曰力殫不但不商而為之辭曰貧無  
毋曷子焉久則地不糞真成瘠矣力不用坐成殫  
矣家無以為生貧果徹骨矣夫乃緣餬口之艱難  
致輸公之濡滯為乾餱之過失起雀鼠之忿爭其  
為害三也嗟乎幸而生聰明才智之子弟是人所  
禱祀而求者而其為害至此無他不學之過亦不

使之學之過也使之學則彼方澤身禮義之林奮  
志勲名之路翹翹自命曰吾士也向被其煽惑者  
榮其若是亦欲從為士而不可得不得不歸而各  
業其業從此四民莫不見義而遷家給人足比戶  
可封矣蕙之欲為舍以教邑子弟者職是故也在  
所緩即急耶諸父老乃悅欲子來其事余不可爰  
興工於三月十二日乙丑落成於三十日己未舍  
三楹苫以蘆垣以甃西依縣治東面龍山弁其門

曰義學而典史邢君式巡檢秦君涵亦與有力焉  
異日者踵事增華尤余所望也因筆其經營之始  
事而勒諸石

奉天府學兩廡記

康熙壬戌

高爾位

國家以人才為本而人才以教化為先自古培植人  
才靡不以學校為亟亟况

龍興發祥之地將相名臣先後蔚起則宮牆俎豆之規  
有司又安敢不加之意哉位自順治丁亥叨列仕



籍厯躋京尹膺豐沛之重任思廣楹戶口以培元  
氣凡無藝之征侵漁之弊以次釐剔夙夜兢兢與  
諸僚屬飲水茹蘗庶幾杜苞苴而絕耗羨仰報

皇上加惠元元至意恭惟我

太祖高皇帝以武功肇基遼左逮

太宗文皇帝纘承鴻業建修文廟

世祖章皇帝撫御區夏以瀋陽為

盛京設京兆立州縣置師儒於時從龍碩彥彬彬濟

濟我

皇上臨雍誦學尊禮

先師可稱盛矣惟是奉天文廟肇創之初大殿雖已告成而兩廡尚未營構夫宗祀先哲所以式後進也恆宏廡廟所以肅瞻觀也邇者

皇威赫濯干羽兩階聲教四訖行見比戶絃歌盛於曩時式廓前規尤在今日顧念長吏俸入僅足養廉文武青衿率多貧士又難以營度之功重煩我父老

子弟於是獨捐薄俸飭材庀工補建兩廡各三楹  
列諸賢之主而祭器亦具焉多士瞻仰之餘庶其  
景行往哲濯磨砥礪以襄

聖天子升平之治乎是役也肇於壬戌七月至九月告竣  
謹勒諸貞石用垂不朽

開原縣文廟記

康熙壬戌

周志煥

歷觀世之盛也比戶絃歌崇儒明道必自學校始  
鄉學三代異名國學遞仍其號鄉學即今之郡縣

學也論道明倫接洙泗之淵源續斯文於不墜養  
老而教射尚德而毓才無不出於是也典最臧矣  
值今

聖天子稽古右文

躬親釋奠

經筵講學博徵碩儒聖賢之道昭明于世誠唐虞三代之  
時也近又奉

俞旨敕滇黔諸省各官創建學宮使山陬蠻瘴之區得沾

聲教矧

畿輔近地

鑿與臨幸若開原者而文廟茅茨不翦土階湫隘豈所以  
尊崇

先聖之意乎但斯邑建立未久前任何公金序披荆剪  
棘勅茅屋三楹奉祀先賢繼任劉公超凡復立櫺  
星門外置左右二坊規模已備惟兩廡神牌俱未  
之設煥司牧是拜踰越二載心懷修葺力不能逮

今敬捐資購工以瓦易茅飾

聖殿而重新之置四配十哲兩廡先賢先儒神位蓋  
欲為荒邑尚斯文之統以觀揚哉

皇上文治之盛即瞻仰宮牆者或亦有所感發焉

重修奉天府學宮記

康熙己丑

廖騰蛟

王化非聖道不行聖道非王化不久王化洽則孔  
子之道益尊聖道尊則王者之化大啟故建學明  
倫所以崇道統正人心而廣治化於無窮者也粵

稽奉天自

太祖高皇帝神武建基

太宗文皇帝式廓隆業創興學校

世祖章皇帝統一區夏文命誕敷今

皇上天縱聖神德威翔洽無遠弗届仁義漸摩無思不服

編戶之于釋耒橫經羽林之士投戈講藝詩書禮

樂之盛四方郡國皆然矧奉天為

發祥首善之地設學以來雖規制漸增而二十餘年未

遑修葺其何以仰副我

皇上崇文重道之至意顧念遼左沃野千里生聚日滋騰  
燿以謫方材承乏京兆亦惟是勞來拊循之不暇  
其又何忍以茲役重煩我父老子弟為爰捐俸入  
不足謀之同事諸鉅公不足謀之諸長吏謀之諸  
紳士僉樂相予志遂鳩工庀材自聖殿而啓聖祠  
而兩廡而廟門而明倫堂胥巍然煥然此皆昔祀  
而今修者也殿以外繚垣奕奕廟以前戟門我我



又皆昔無而今有者也經始於康熙四十八年七月十三日落成於康熙四十九年閏七月初十日計工五千三百有奇計費一千一百二十兩有奇後成而遊聖人之門者共知聖道之大將伯之助其可泯歟夫明政刑正風俗者

天子之化也謹庠序飭倫紀者孔子之教也今學校之振興若此滿漢士子服習其中優游德教人文蔚起不將與鎬京鐘鼓並美千古而不朽哉謹彙襄事

諸賢錫之於石俾後有可考因并記之以詔學者  
重修銀岡書院記康熙乙未  
屠沂

復陽郝中丞留居時所築室為書院公之自記備  
矣重修者誰邑令焦君登正之宗令光大之也余  
惟天下之書院多矣惟嵩陽白鹿嶽麓石鼓四書  
院以大稱豈高閣周建長廊四起云爾哉蓋大其  
人故大其書院也余讀公之文章想公之行事而  
有以識公矣公學探理窟才蔚國華嶽嶽懷方不

移不屈前後歷任政績昭然而直言敢諫則呂獻  
可之先見范景仁之勇決殆又兼之矣顧公崎嶇  
龍塞二十餘年讀書深造味道之腴有大過人者  
觀公之自記非真聞道者而能言之乎後人登公  
之堂因依手澤有能識公之旨證公之心或聞風  
興起薰其德而善良鄰魯文物近在海隅以成

聖天子壽考作人之化則是公有大造於此邦也茲鐵嶺  
片石即與嵩陽白鹿嶽麓石鼓四大書院而五焉

奚不可也夫興行教化守土之責也表彰前哲後學之事也今余忝京兆後又與司空中美君為同垣友於公為子姪行故因宗令之修復書院為文以記之宗令者誰江西鄉進士一驥也有善政與邑廣文何師曾者共襄斯舉則其人可知矣

錦州府文廟記康熙丙申

馬鍾華

錦郡之有學蓋即明之中左屯衛學也攷之誌書創建於正統元年繼增修於成化隆慶間嗣是廢

修無常泊明季兵燹之餘學宮遂湮沒於荒烟蔓  
草中矣今

上龍飛之三年以錦州為府而府學復設郡伯宗公因遺  
址而重建焉凡殿廡祠堂門坊池橋之屬釐然具  
舉但歷年已久棟摧瓦解砂礫滿地蓬茨盈堦過  
者每興茂草之嘆余下車之始目覩心傷每與錦  
令周君議欲更新之適年值荒稔物力維艱姑少  
待焉前大司成尹公入廟瞻禮不禁歎息曰廟貌

傾圮若是非所以重道而崇

先聖也遂慨然有捐修之志夫致仕者尚銳意從事况  
余職守茲土則是役烏可已乎爰率諸僚屬與縉  
紳士庶或捐財或輸力無不踴躍從事經始於戊  
戌之仲夏越次年秋告成構正殿三楹因舊規而  
加增其制兩廡各三楹啟聖祠三楹明倫堂五楹  
又拓戟門坊砌亞宇墻界之櫺星門舊制卑隘今  
易以木下實上空高旁低壯若牌樓兩旁砌八

宇牆規模嚴整左右建坊峙擢通衢他如泮橋拜  
臺靡不盡制入其門者仰宮牆之魏煥睹芹藻之  
青蔥而釋菜鼓篋講學行禮俾人勃勃然有希賢  
希聖之思洵陶鑄人才而振興斯文之盛地也是  
役也倡之者尹公和之者余而至於程工飭材營  
建措置則錦令周君之功居多云

海城縣文廟記

雍正戊申

張士毅

海邑文廟舊在縣治西南今明倫堂其故址也地

既僻凹又經風雨剝蝕差不肅觀士毅以中州末  
學來令茲土每逢祇謁仰止庭除徘徊悚息即有  
更新之志恭惟我

國家崇儒重道遠軼漢唐矧海邑為

龍興盛地王化所昭廟貌不肅其何以振興文學對揚  
休命也乎越歲丁未廣文齊公王謨秉鐸縣庠雅意襄贊  
並詢諸闔邑紳士等僉有同志而移建之議遂決  
因卜建於新城厓石山陽遠山如屏近水若帶池



擅龍蟠之勝峯環虎踞之奇地滿百弓力輸衆助  
工始於是歲八月越戊申歲九月告成自照壁八  
字牆起內建櫺星門三間東西廡各三間大成殿  
三間因舊明倫堂為啟聖宮周圍紅牆八十餘丈  
越翼日迎位於廟用特士毅偕諸紳士人等拜奠  
堂下朱楹丹渥廷陞崇高視諸舊制頗肅觀焉至  
於祭器樂府尚須完整新甫徂徠容俟栽培不具  
論敬以事之始訖勒之於石

奉天試院記 雍正癸丑

呂耀曾

拔士之必有試院非僅以壯觀瞻崇體統也蓋欲  
覘其學者必令有以盡其長而欲盡其長者必先  
有以安其所奉天為

國家發祥之地體重

留都故與直隸共省而不與他府埒歲科兩試學政  
之事亦屬府丞示有別也第裒集生徒每考與試  
不過數百人又不若直省之衆多是以昔之日未

建試院皆臨期架木設棚遇風雨則不免淋衣污  
卷多致草率成篇或有未盡其長之慨焉

今天子御極之十有一年予蒙

恩特簡來尹茲土而同榜族兄果初先生先予來視學建  
院之議已有成規即丞署之東偏崇舊基而廣之  
堂分前後場列東西門楹井竈吏舍鼓亭三閭月  
而告竣葢已煥然而可觀矣約其費八百餘金果  
初首先捐俸各屬官紳及生童慕義者均有助而

治中王柱國承德令蔡書升則力贊而捐助為多  
錦府一屬亦聞風興起同時建一試院云憶壬辰  
歲予世父司農坦菴公視學於此樂育人才刊有  
文萃一編一時紙貴猶未獲創興斯舉今果初毅  
然而成之夫豈非不朽之業歟予新承

上恩命以左副都仍管尹事吏治民生尚需整頓任而未  
優違敢言學而不虞不文以為之記者以果初之  
創是學也蓋欲多士之安其所而盡其長非僅以

壯觀瞻崇體統已也果初行將內調甘崇之愛固  
能信其不朽且樂多士之相礪於有成也而予也  
更將竟果初之志置學田以給供膳矣

欽定盛京通志卷一百二十七

欽定四庫全書

欽定盛京通志卷一百二十八

國朝藝文 十四

記 二 釋典附

表

贊

跋





欽定四庫全書

欽定盛京通志卷一百二十八

國朝藝文

十四

記二

聖駕四謁

祖陵禮成恭記

阿桂

皇帝膺

天成命四十有八年繹思

祖

宗興業造功以奄有九有之師啟無疆大寶祚景嗣

舊都神臯隩宅

山陵邃輦

陟降攸憑粵自乾隆癸亥甲戌以洎戊戌式循彛章三修  
謁祭之禮隆儀愔宣

孝德光被迺者

特詔有司選和闐貢玉新作

冊寶格於

太室而以舊所奉者尊藏

盛京

太廟洪昭

列聖之丕庥顯光闡示無極將

遣皇子諸王等翊奉以行

皇帝曰朕巡省舊京肅拜

園寢於茲五年維艱難締構之緒夙夜常在朕心益宜以

時敬申報饗其以孟秋啟軫熱河有事於

三陵夙戒所司一如舊典迺五月甲寅

車駕發自

御園

駐蹕避暑山莊越六月丙子

詔以伏暑閔勞烝徒令太史改卜吉日

恩意滂泐歡音雷動越八月壬申恭遇

萬壽聖節

上御淡泊敬誠殿諸藩從官入賀如儀越三日乙亥自  
惠迪吉門

啟蹕東巡蒙古科爾沁土默特諸部落以除道成梁奔  
走恐後所在塵肆櫛次生殖蕃阜一比內郡縣塞  
田畝千鍾刈獲彌望咸感荷

聖朝涵濡休養之厚澤跼仰

羽蓋權歌載塗爰循柳條邊以東入九關臺門將軍侍  
郎府尹以下緣道迎謁各修乃守越九月戊戌

車駕至

興京謁

永陵越五日癸卯謁

福陵若翼日甲辰謁

昭陵功臣陪塋以次

賜酌祀事儼恪蕭鄉肝升

神明居歆多福單厚乙巳

車駕入

盛京徧禮於

天壇

地壇

堂子

太廟

蒞舊宮瞻視棟宇

皇情愜穆越三日戊申肆覲於

崇政殿朝鮮國王遣陪臣奉表起居鞠膾在列

賜詩褒錫慶賚有加遂大宴羣臣頒幣以差中外愷樂  
若翼日己酉於

宮中行事

神禮庚戌發自

盛京先是有

詔推恩給復奉天所屬祖稅一年行所過者半之除莊頭  
輸倉粟萬餘石旗地歲納米豆草束十之五囚輕  
繫以上至徒流減免如例民男婦七十以上優以



粟帛廣博士弟子員額凡扈從王公諸臣暨大吏  
羣吏之有執事於

行在者差別敘錄具準乙未己亥乙巳丙午節次指授  
行慶所逮羣倫靡不霑溉越五月乙卯次廣寧禮於

北鎮廟它若遼河渾河太子河秩在祀典者咸先後  
遣官將事懷柔百神山川受職越十月甲子次山  
海關禮於

北海神廟登澄海樓以望海馮夷奔越恬波效瑞越

八日壬申謁

東陵如初禮乙亥

車駕至自

盛京若翼日丙子

親享於

奉先殿告成事焉權自發輟熱河六旬有二日而

大禮轉備懿鑠於融曩古無尚臣仰惟

國家光宅大東以建我不丕基

神威燮伐震耀典冊

皇帝虔共昭事既日發金匱周覽本末灼知於

受命之原而猶不憚

屢駕之勤

巡行川壑諮度

聖蹟於赫圖阿拉見

創造之勞於遼瀋見

經營之蹟於寧遠錦州松山杏山大凌河薩爾滸尚間

巖諸地見

皇天助順集勲制勝之由然流連勤懇久而彌摯細及一名一物亦必反覆覈證以毋忘先民淳厚之俗用是摛為

大文甄謨鑄雅

御製薩爾濟書事紀功勒實照燭宇宙既

宣付刻石其處以詔無窮而前後詩章規重矩疊無非

懷

創業之不易而益憬惕於

守成之難長言諄復盜溢楮墨爰

命諸王子敬繕一通櫝而藏諸秘閣所

垂訓於億萬禩子孫者

睿慮深長實為至詳且切若夫植根樹本崇飭典物則

有如

盛京諸

壇

廟舊領祠官隆墮周墉嚴翼無改復

命將作繕葺規模鼎新奉天所屬諸城歲久侈剗當葺  
治者十有八

特詔大臣相視大發帑金撤而甃之植良土剛金湯永  
奠四庫全書排葺告歲復於

盛京建

文溯閣分部藏弄琅函玉笈奎壁增輝惟

聖天子眷顧邠岐於事神誠民緯武經文諸大政一切

修明百務具舉而

淵沖默運所以周暨於萬方臣庶者亦無不襲和紹德

推本

孝熙

宵旰勤咨彌昭

行健臣侍直樞禁日聆

睿訓仰見我

皇上體

祖

宗之心為心法

祖

宗之治為治寅承對越日昃不遑故能精意孚通受釐集

福

至仁達孝一以貫之固非徒豐鎬歌詩枌榆樂土飭靡  
文而侈掌故者所克比擬萬一臣學質禱昧愧無  
以率先館閣諸僚導揚



盛美而職領

起居注法當纂次事實以付史館不揣固陋謹件繫月

日撰記一篇竊附於記言記動之義曷勝悚戢懼  
忭之至臣阿桂拜手稽首謹記

聖駕四詣

盛京恭謁

祖陵禮成恭記

有序

經典篇

吳省蘭

臣惟植杓殷袷揆同疇曩山原朝拜書缺有間焉

顧周官大宗伯之屬或司祭墓尚書大傳周本紀  
皆紀武王上祭於畢馬融以謂畢文王墓則其禮  
實推輪姬室後漢光武謁長陵者三有事十一陵  
者四孝明率履勿越致甘露降樹之異和安以下  
舉亦僅矣自晉迄明時或修述第史氏艷傳以飭  
儀度致感慕為極若循是繹渟締構勤劬政本翊  
萬禩者未之前聞臣嘗竊怪太宗有唐令辟備衣  
饌欲親陵寢迺召齊士員謂從官曰朕若行使

勞扈從遂自抑止命江夏王道宗代行嗣終唐世  
惟永徽一謁昭陵開元一謁橋定諸陵而已意魏  
徵獻陵之對所繇感發惜不能格非納善坐視其  
主數典忘祖而不自知也惟

聖清肇域大東輿燾宙合

興京

盛京奉為舊邦其山曰

啟運曰

天柱曰

隆業儲靈甄貺若神鼎之峙峙

三陵康焉

皇帝祇亮荃宰懋席蘿圖繩

祖武而追來孝自癸亥至戊戌三謁

橋山愛慤致誠錫美閩澤

巡歷逾習優愼滋懃舟瑤陟降之原旆鉞指撝之塹考地

徵事

宵旰佈然錯事布宜是行是

訓惟曰欲至於萬年越歲癸卯符虞巡之五載爰蠲吉

日昭事

祖陵

上典於是乎四舉

臣

謹紫五帝之書為典尚書堯典傳

言堯可以百代常行之道爾雅典常也經也周禮

六典疏常經即是法式

臣

以應奉文字為職媿不

能效揚推於萬一嘗伏讀

聖製敬自尋聞仰見

冊寶有貶藏之

誥

壇廟有整葺之

諭獄瀆有新宇之

制城洫有藏工之

命秘閣有度書之

記藩服有柔綏之

詔胄筵有聰聽之

訓星潢有敦叙之

旨他若班朝錫燕優老譽俊練士校射蠲賦肆青惠農  
商卹行伍

紫綸所及萬彙春回然後展謁

東陵

回鑿告

奉先殿而慶大禮之成亦勑亦因法可世守堯羹舜墻有

典斯在竊不揆顛味撰繹典一篇謹拜手稽首以  
獻其辭曰

於顯哉瞻仰大園消陽無計量相因為氤相显為  
氤垂有常象資始大生號物有萬熙於默成疇勿  
報本返始而歸貺乎太清粵若叡智率親率祖桀  
劇仁義雖遠必追繇繇生之初謂篤不忘廟以貌  
之焄蒿胗蠻猶未足以稱誠幅而釗精氣於所藏  
益以教敬致嚴勗無疆也 棧棧 鮒儒剽傳章句擊



文泥古勿克緣情章禮宣範於後杓鑿無所取材  
若訟是聚料水室源而誼迺昌於建元典午崇陽  
之瑜拓跋威樂之珠仙李三原之崩天水永昌之殊  
或數或疏有舉莫敢廢耶律完顏循典無躋元馭  
區夏朝起輦谷然皆密邇圻甸或十舍五舍而遣  
地不必其開迹志不必在攷憲毋慢焉已明徙其  
都睇鐘阜如四極中葉以降昌平結轡彼太室之  
勿親尚遑問夫神域限中外以一墻跬步勿踰庭

戶赳赳不自照更遑恤締造之擲沐風雨哉是用上帝勿馨厥德迺東顧遼左將全界所有而我

聖朝膺圖籙以龍興俄朶也伊古積善累德顯統運期景命長遠者莫過於蒼姬履武敏歆載造邵室不窋棄稷自竄公劉廡之幽館允荒君宗是依古公避薰育走馬岐下一傳再傳養晦遵時逮前歌後舞施輕呂於坳墅義士猶或非之謂口實不啻於升陲然而雅材繼作肇祀則陳即室匪康則緬涉

渭遡漆沮之陶復述彊理於道允其詩曰無念爾  
祖又曰駿命不易一篇之中三致意焉矧我

帝業之會昌也朱果靈暄孰與祈禱於郊禱三姓渝平孰  
與爭田之質成赫圖阿拉之復孰與止旅於芮鞠  
尼堪外蘭之盡孰與構讒於侯虎七恨之齋仇孰  
深於串夷九部之推功孰多於伐耆八旗分屯軍  
孰整於三單三田受降信孰周於崇墉

帝出乎震不崇朝而翦四路之旅天聰崇德繼奮

皇武既環躡其郊郭舍而勿取彼不數稔養癰自感君抗憤以殉國臣歸命而乞師我

世祖爰命宗袞整旅入關雪其彌天之恥蠲我夙憾沛我新惠駸生氓無主澥水羣飛然後

御宸極而大居正繩契已違易姓受命應運之際有如是哉德若湯武猶有嘆焉奚論豐沛與淮泗夫坑中圖大宰世之樞也追本敬始詒燕之撫也載毫者儵景柏居鎬也倕原茶豈以西秦東約殊哉憬惺

乎肇造之機符也左遼右瀋

帝省溥源長白隆興

天作高山

列聖經營鼎於是成憑霄之所鶉毳精氣通行固萬葉以  
為量矣

章皇帝紹天闡繹鎮中區以運四維

仁皇

憲皇繼文繼武度羣洽乎重熙迺寔

福壤辨陔邇圻因乎時也且我

聖祖功德大成枕矣旼矣樹神明之式殷懋滿珠曰維初

宅三厯

陪都誌永言裕維則也

聖考躬代事於潛邸十三年中貞度勅幾不遑日廼時蓋  
有所矣

皇上憇雲雷草昧之難辛率

祖攸行發祥積慶洄測其源自乾隆八年殷禮肇稱緝

五朝之重光觀

四祖之丕靈涉山海之嶮阻履肅慎之墟吐景光橫甸之  
舉考度三關之圖訪戰蹟於鐵背界藩斐芬尚間  
吉林松杏呂翁山之厓采風土於威呼法喇拉哈  
周斐額林帕格羅丹賽斐之細優宗潢藩部扈從  
留守陪臣髦俊耆者武士之殊施秩徧神肆覲賜  
酺簡軍行獮宥罰給復卹商之茂禮既脩廼復洞  
洞屬屬如也越十九年再詣如初四十三年

上儀三述視甲戌

天子謂敬以愛達禮以義程感以慕至情以性生謨以  
遠裕政以久成鑒古者邇不泄奉先者章勿忘典  
莫切於上

陵也

重巽以申之後甲先庚諱迪雲初億禩欽承迺定三載  
簡命皇子朝

三陵之典而期嗣舉於十數季然而



乾行之健無息

大孝之慕不遷蓋推敬

祖者以格上下神祇即推法

祖者以究保聚休養故重墳周孺將作具暉也靈川秀巒

祠官肇庀也嚴闈峻堞金湯申鞏也帑庫廩倉莞

鑰脊董也四庫全書籤厨再就庋閣曰

文溯於過澗之義湊焉闡河貢璆俶篆

懿號侯其禕而迺祇晉

世室馳昔琢於舊京之

闕宮禮惟時惟稱惟宜也既以翊奉

命寶胄親藩侑馬容臺又之

皇帝曰時哉朕瞻拜

園寢五稔於茲夙夜繾綣動台志其練吉親往報饗爰諏

孟秋自

避暑山莊啟蹕

帝廛行扈烝徒之涉霖滂冒暑暍也期展八月屆時日

月會於壽星諸藩從臣矚景抃蹈呼

萬歲賀

聖節越既望

斗車東較高涼載塗塞寓激鎔由

惠廸吉門指柳條邊而進發蒙古四十九旗扎薩克

各司其屬歡呀拜匐入九闕臺門奉天宗臣統軍卿

尹庶尹奔走伏謁咸述厥職九月戊戌謁

永陵癸卯謁

福陵甲辰謁

昭陵酌及陪塋當是時霜露既降

皇情怵然通微合漠如存如生日相形留民無能名

至誠乙巳

車駕至

盛京

園丘

方澤

堂子

太廟咸致禮焉迺翕翕習習還

莅舊宮十亭翼如二木崇如循省

堂構豐規廓闔入室出戶儼若駸假

音容函香裸鬯徧於方望迺

御崇政殿大朝會朝鮮國王使臣奉表起居在列蹈舞

班末蕭露繼濟需雲累霄象泰之交孚兌之說類

親賢樂利之情示勞來匡直之惠十賚肆施若甘

露霈渌澤醴郁視昔加渥焉於是周親卿士百執  
事相和而歌曰練時日兮

駕巡東徠

珠邱兮精裡通幽居愆兮朝鄴宮開

南端兮降福崇決

慈惠兮懋賞重神人餽兮四海同候人叟吏相率而歌曰

卑司灑兮箕司除肅興衛兮

帝之謨吾何力兮

賜級都慎扛守兮裛區區膠黌序塾之子挾冊而歌曰

景

成謨兮閣鳳翔猗作新兮

文溯光員增廣兮勸就將維

壽考兮作人長子衿青兮民之望仁有造兮我奉璋旗  
莊編戶之衆操業而歌曰

堯留韭兮

禹留糧歲四誦兮昏樂康

曾孫甸兮富子藏蠲復蠲兮箱斯倉稱

萬壽兮濟公堂薦孝弟兮力田履韎韜衮服之士擊刁

斗而歌曰右鈕勣兮左斐蘭維弢矢兮夙所便

德威疊兮包垓埏偃玉鈴兮職負蘭備不虞兮於久安

旅嘽嘽兮武桓桓奏爾能兮

皇情歡優楮稌兮九府園酬

渥惠兮嫺軍團齶齒鮑背之容奉粟帛而歌曰牢執豕

兮酌馬斝享泰平兮如春醪近



天顏兮承嘉褒祝

聖壽兮

天高高億萬歲兮偕忻翹飛

翠華兮曳雲梢矜疑省釋之徒脫縲綫而歌曰園之土  
兮福之堂犯有司兮惴不遑

堯曰宥兮踰所望劇自懲兮順非常懿景燦頌聲作猶  
且循粉社考茨椽勅

萬幾酌民言裁豁山而渙號難霞綳以披章勤勞七起

紹衣詮詳維巡之初

賦以昌之義用昉彰長言不足

詩以永焉總再至三至四至而

家法治法彌聞大韞繫年駢輯

申命天潢益勸九歌俾勿壞之義也沛宮父老南陽故

舊依戀

翠趕雲瞻日就

皇上府鑒畫誠

玉鑿為之宿留迺履疊道之坦蕩摹戰圖之阻巖班獄  
秩川邈迤入關翼翼舒舒循薊門而朝乎

東陵禮率初孟冬既望

蹕旅京師告藏事於

拓室謂通於神明光於四海者也

緒業肇敷篤丕丕基

聖有謨訓信如四時制雅輯頌炳蔚來茲彼重來上陵  
之典參敵神恠推媿漢儀以昔視

今若白芨之料大椿不已魁乎乃廢載歌曰闢門基  
祥存

原獻馬翊衛

陵園視京輦馬

仁祖勤止訃謨顯馬

聖皇丕繩甄美善馬於萬斯年繹成典馬

表

恭進

盛京通志表

汪由敦

臣  
等奉

勅纂輯

盛京通志恭呈

欽定繕寫告成臣等謹奉表恭

進者伏以

皇猷建極瑤圖尊天作之區

聖治崇文寶冊煥帝臨之宅載堯封之井邑秀孕丹陵

記漢服之川原祥鍾白水萬世丕基鞏固一時鉅  
典光昭珥筆為榮垂紳共慶竊惟泰皇畫野制八  
土以居方顛頊分疆度九區而定地迨版章之益  
廓侯甸星羅遂誌乘之紛傳簡編日積似王治水  
廣搜岳瀆之奇伯益作虞遠志海山之怪定職方  
之掌職在周官輯地理之書昉之班史諸道成經  
於隋代兩京續紀於唐時宋改軍州誌太平之寰  
宇元臨中夏紀混一之方輿他如咸陽三輔之圖

以逮曼倩十州之記叙桂林之風土亦脩叅稽識  
荆楚之歲時且資考鏡莫不垂之故府藏以名山  
况夫景命方隆載溯發祥之地神阜永奠遠維肇  
迹之邦瞻松柏之丸丸毫都作頌撫枌榆之厯厯  
漢社標名啟運鴻篇令典成於勝國承天大志嘉  
名號曰興都厯披徃籍之遺快覩

熙朝之盛欽惟

皇帝陛下功齊博載德協苞符探星影於河源化孚有

截覽日華於海島光被無涯固已萃一統之車書  
脩萬邦之圖籍廼

念瀋陽之域實為

王氣所鍾遡肅慎之分封暨公孫之割據貞觀耀兵於  
唐壘明初設衛於開原沿及

本朝巋然都會鴉青啓瑞河山開百代之基鴨綠凝  
祥風雨壯三韓之勢比周京之岐卑梓木千尋擬  
唐室之晉陽李花一樹顧此秀靈之壤可無紀載



之編乃前朝之舊志雖存既嫌荒略

昭代之成書具在復涉煩訛爰

降明綸重修善本期體裁之簡當載筆恭嚴約部分於  
整齊操觚特慎發凡起例規撫悉稟乎

睿裁別類分門據採盡衷於

欽定首登

聖製如尚書之冠典謨次列京城若下武之歌豐鎬由

廟

壇而

陵寢挈領提綱繼星土與山川辨方正位郡統邑而京統  
郡人次地而物次人自戶役以迄兵防經綸大備  
由忠孝述推列女幽顯咸昭風俗淳龐兼法輜軒  
之採藝文典貴並供石室之儲韶律類更韋編幾  
續志

龍興之重地纂成適邁辰年垂虎炳之弘文書就先呈

乙覽銀州鐵嶺皇哉全盛之規玉軸牙籤允矣不刊之典

臣等才慚吐鳳學愧囊螢欲賦三都徒構思於十稔未窺八索敢托業於千秋幸承

訓示之詳得卒編摹之後按圖改證如遊石紐之鄉執管鋪張恍見玉璫之舊伏願

珠囊朗揭

金鏡高懸念柳風沐雨之勤無亡纜

武思航海梯山之盛更切詒謀咏流火於吹豳剝棗烹羊  
懷舊俗溯胥原而陟嶽酌匏執承繼休風將見龍

負王舟重集萬方之玉帛龜呈神籙再凝五福於  
圖疇矣臣等無任瞻

天仰

聖激切屏營之至

贊

御製盛京賦贊癸亥

汪由敦

丹陵蒼蒼京邑煌煌我

皇至止龍旗洋洋詳覲

橋山祀事孔明載

臨郢宮有秩其容以朝以晏以詰戎兵儀舉禮脩風翔  
恩滂爰灑

宸翰經緯宮商播藻雲漢濡毫溟滄含跨東馬陶鑄班  
授筆不停綴蔚為

天章昭示萬古何天之龍傳觀駭汗盥誦激昂敬勒筠  
篆冀託無殫

跋

御製盛京賦恭跋

癸亥

汪由敦

臣等伏蒙

皇上宣示

御製盛京賦三千三百餘言臣等依文輯注統若干萬

言仰見

睿藻裔皇輝麗雲漢宇宙絳古今炳典謨鏤圖籍有書契以來著作之府鴻章鉅篇未有盛於斯者也

洪惟我

皇清凝受

寶命奠億萬載丕丕基肇迹神皋撫臨中夏

發祥流慶寶始

盛京

臣

等竊嘗誦詩周文公召康公推述先王先公

之始基靖民自有卽漆沮皇澗過澗陟降原隰以

至作豐遷鎬築城度室之事皋門應門靈臺辟雍

之宏規於耜築場索綯祭韭執豕酌匏之故俗微

而松柏厲鋸周原董荼園鹿潛魚脩形於雅頌凡

以明著祖德遐暢皇風薦扶輿之嘉祉鞏繼序之  
永圖豈徒侈都邑之隱軫誇陸海之膏腴鋪張炫  
耀藻賁翰云爾哉欽惟我

皇上纘

列聖之宏緒際三登之景運聿修懿典時邁舊京脩法駕  
奉

金輿罄厯載之積誠謁

橋山而展孝禮成肆覲會同有禱以燕以賚中外禔福望



幸之黎庶聞

和鸞而歡呼扶杖之耆老瞻

翠華而相慶

祖宗之靈斯格臣民之和允洽於是本覲

光揚

烈之忱溯

基命造邦之統攬形勢之渾雄仰宮闕之素樸緬英賢之  
勲績懷德化之忠厚華實之毛充叔澍濡之澤鴻

龐穆然

遠念知夫天作帝省之勤所以孕虞育夏甄殷陶周者  
厥有所事爰抒

寶墨挾

奎章思若湧泉筆不停綴勒為斯賦垂示無極乾坤之  
容日月之光雲霞之采海山之藏覩化工而雕績  
纂組不足以為色聞韶護而鏗鏘考擊不足以為  
聲彼研京十年練都一紀者曾何足以仰企萬一

哉臣等徵金匱之秘稽延閣之儲旁羅四庫綴緝  
二酉疏舉徵引多慚漏畧附名簡末榮以為愧臣  
具等敬跋

御製薩爾澂書事恭跋

戊戌

于敏中

臣聞之書云皇天無親惟德是輔春秋傳云師克  
在和不在衆伊古經營締構厥軌咸具其有能天  
人叶謀者蓋寡乎罕紀焉洪惟我

太祖高皇帝受

天明命肇造區夏時則有若薩爾濟之戰以我有衆數千  
威明兵四十萬

神笑協幾心德合一若林之旅罔有敵於我師於是蹂之  
尚間崖膊之斐芬山翦之阿布達哩岡殪厥大帥  
殲其士殆盡浮鼂塞川喋血殷野走葉赫降句麗  
曾不越五旦晦而剗無遺孑若摧枯振箠之易臣  
嘗稽揆史冊惟漢光武昆陽一戰為得天助然光  
武猝與敵遇會大雷雨幸以成功孰若是役之屢

戰克捷我武既張若反風揚沙之異

天特於終事時假以示應固非昆陽之戰所可同日語矣

我

皇上繹思

祖烈祇迪

前光追維

櫛沐之艱難丕顯

成謨非漢唐開國所能及爰紬金匱石室之書

親御丹臺聽詳紀實於赫

神功維

聖克迷兀

欽承之本念蓋一篇三致意焉亘古未有之

偉烈緯以亘古未有之

大文俾天下後世咸知

國家集勲垂統震爍古今其至於億萬年永無斁以

鞏我丕丕基而我

皇上嗣服纘圖義征不諛機鈴

獨斷默契傳心所為以守兼創者其凝承固有所本耳

惟是

鴻文副在秘閣海內無由悉覩臣不自揣量輒錄一

通刻諸貞珉昭示無極而臣區區欽服微忱亦籍

以抒寫萬一云

欽定盛京通志卷一百二十八